

思

軒

文

集

思軒文集卷之二十二

行狀

資德大夫禮部尚書贈太保謚忠安胡公行狀

公姓胡氏諱漢字源潔號潔菴上世宿遷人劉宋時有  
諱藩者任太子左衛將軍始遷豫章數傳而至唐國子  
博士誠生五子其仲曰瓊任常州刺史卒于官其子持  
遂占籍為武進人持四世為宋樞密副使太子少師文  
恭公宿又十一世為常州制置中立中立生昭公之高  
祖也曾祖庸元奉議大夫江淞儒學提舉祖禎常州路  
醫學錄考宗仁皆以公貴贈光祿大夫少傅兼太子太

師禮部尚書曾祖妣章祖妣徐妣李皆贈一品夫人公  
生而髮白如絲彌月方黑生之夕母夢僧持三花者以  
一遺之覺而生公居數日有僧自吳來見徐夫人問近  
得何祥夫人曰無他祥但新婦生孫爾僧固索觀之公  
見僧微有笑容問之則曰吾師天池在老示寂後嘗見  
夢云我今生某家後當大顯爾宜來求我一笑為記  
今果然聞者咸以為異七歲知讀書出就外傅容止懔  
懔如老成人每行中道見長者必肅弱冠入邑庠服勤  
匪懈予外祖朱文會先生時為教諭甚器重之公亦盡  
隆師之禮自是德器大有造就洪武己卯以詩經領鄉

薦庚辰登進士第授兵科給事中遷右給事中

太宗皇帝入正大統銳意太平之治遴選臣工皆不次擢用之遂以永樂元年陞戶科都給事中五年丁亥

上知公忠實特命巡行天下察人心向背仍出新製性理大全為善陰薦孝順事實諸書俾勸勵之公即日上道雖窮鄉下邑足跡無不到而於宣德化求民隱慮無以仰副

上意而常懷靡及之思者尤勤勤也丙申秋八月聞李

夫人喪還朝仍俾往湖湘冬十二月歸乞終制

上不允陞禮部左侍郎且諭以死生常理宜襄事將復

有所遣明年正月使江淞諸州己亥授嘉議大夫癸卯  
還朝時車駕巡幸北京公馳謁行在所

上見公喜大笑呼其官而不名曰卿驅馳勞頓宜少憇  
于外有頃復召入與語凡所歷山川道里歲豐儉吏治  
得失民休戚有無無不問公隨問而對皆稱旨且深有  
裨益比退夜漏下四十刻矣先是

仁宗皇帝為太子監國有飛語聞於

上上令公察之公密疏其孝敬等七事以聞

上覽疏大悅而

仁宗固未之知也比嗣位給誥命加授正議大夫資治

尹尋遷太子賓客兼國子祭酒去官南京蓋疎之也未幾閱章奏見公所上疏乃憮然悟方議召用而

龍駕上賓矣

宣宗皇帝即位復禮部左侍郎兼職如故是年公自南京來朝有旨留任行在禮部事宣德丙午春陞行在禮部尚書秋八月扈從往武定州討漢庶人還賜所沒入男婦數人丁未復給誥命授資善大夫賜近第于長安右門外戊申賜銀章四其文曰毘陵胡濙文恭世家大宗伯章清和恭靖是年八月復扈從巡邊至會州己酉命兼掌詹事府事五月復護駕至宣府時常民有滯

惡者既抵法遂以其宅一區沃壤千畝賜公仍蠲其租  
入辛亥春正月命燕行在戶部事二月

上遇萬壽節親製詩一章賜公及蹇忠定公楊文貞公  
文敏公且曰朕茂膺天眷上怡

宸慈惟爾四人贊翼之功居多因賜宴內廷極歡而罷  
壬子新建禮部成命光祿就部堂設宴六卿臺憲皆預  
焉公至是日見親任凡有匡正皆嘉納之每燕見便殿  
上見公銜章於袵輒問曰卿欲有言乎即取付諸司施  
行之

上喜御宸翰時揮染以賜二三近臣公受賜尤多如重

陽歌狻猊圖之類是也乙卯滿九載賜勅褒獎仍有寶  
鏐羔酒之賜

今上皇帝踐祚亦惟圖任舊人凡國家大事公皆與聞  
蓋不特典三禮以寅清為職而已也戊申加授資德大  
夫正治上卿自是復三考績賜賚皆有加甲子以年滿  
七十乞致仕

上以公精力未衰勉留之已已

上親征北虜命公居留秋八月陞太子太傅階榮祿大  
夫景泰初元給贈三代誥命辛未春災異數見公以縻  
祿妨賢辭不許壬申陞少傅兼太子太師二俸兼支未



幾辭一俸癸酉進階光祿大夫復給誥命甲戌乙亥又  
兩上章辭不許特免侍朝丙子率諸大臣抗疏言謹天  
戒且乞賜罷黜又不許時年已八十二退既不可而進  
不能行其言徒拊髀自咤公素無疾是冬忽疾作不良  
於行明年天順改元

上復寶位雖踴躍期自效而筋力竟不可強遂懇乞謝  
事且辭免師傅二職皆從之與尚書王公直學士高公  
穀同日賜璽書白金寶鎡金織叢衣給驛舟以歸而公  
有宅心允臧處事惟謹雖經變故無改朕常之諭歸之  
日鄉人老穉聚觀者以億萬計公陳所受賜于堂以侈

於衆衆既榮其歸而復知為

上所眷顧如此咸嘖嘖稱羨而公亦感激泣下是年冬遣冢子猷來謝恩

上賜猷官錦衣鎮撫俾歸終養公之弟克恭克寧克誠時皆高年七十餘蒼顏皓首日宴會於一堂之上遂顏其楣曰四老壽愷堂春秋展墓必力疾以往今年秋疾劇言不及私惟呼諸子勉使圖報國恩瞑目翛然而逝天順七年八月初八日也春秋八十有九終之前一夕郡守卓天錫夢公來辭曰吾翼日歸矣願假筆札以報天子守初不以為意比午聞公終則駭然始覺其為異

云越數日守遂以聞

上勅禮部賜祭遣官營葬公為人顓謹雖小事不苟而於事

上之際尤加敬慎故能際遇

列聖立朝幾六十年恩榮始終卓然為一代名臣人罕有儼之者公性最好善聞人有一才之長一行之美必汲引之其簡拔士類尤多自丁未至甲戌凡十開科會試公皆知貢舉名卿碩儒鮮有不出其門者與人交無少長一以誠其接人必以禮雖屢過從亦不厭人苟有求雖於義不可亦不峻拒平居無疾言遽色雖賤至賤

隸亦善遇之然則公之賢豈獨賢士大夫知之雖愚夫  
孺子無不知其為長者也公平居手不釋卷更喜為詩  
文每公退輒持片紙作蠅頭細字終日不廢晚年位望  
益尊酬應益富凡四方儒官官署以至釋老之廬求文  
勒石者在在有之彙而成帙總若干卷題曰芝軒集以  
宣德中嘗產靈芝于南省東偏故名其所輯錄又有衛  
生易簡方若干卷律身規戒一卷行於世初娶范氏宋  
石湖先生成大之後先三十六年卒繼娶張氏皆累贈  
封至一品夫人生四子三女子曰洪即鎮撫母喪廬墓  
旌其門為孝行女贅林圯范氏出曰衿錦衣衛千戶土

木之變歿於王事曰礪錦衣衛指揮僉事曰礪冠帶舍  
人女適成國公朱儀陽武侯薛琮張氏出也孫男一泰  
曾孫男一維公以忠純和裕之資醇篤不欺之學致位  
六卿享年九袞德善功烈宜多可書而予也鄉郡晚生  
從公之日淺況公平生不事表暴凡所獻納皆祕不聞  
於人

上或命公條列事宜比退即焚其草公既終家人求其  
遺稿惟歷官歲月而已猷將以某年月日奉柩與先夫  
人合葬孝仁鄉周莊之原乃以書來京師戒其弟礪請  
予為狀與先君子與公居同里仕同朝而公弟克恭予

姑之夫也世篤姻誼故厚故不辭為誤次其大槩以備  
秉掾筆者採擇云是歲十月既望

賜進士及第翰林院侍講姻家生王與謹狀

資善大夫南京吏部尚書謚文通錢公行狀

公姓錢氏諱溥字原溥號九峰一號瀛洲遺叟松江華  
亭人生而穎敏少從鄉貢士李存愛授春秋博覽善記  
宣德壬子以書謁巡撫侍郎成公均覽之喜曰聞松久  
乏進士此生甲科才也遣充郡庠生時廬陵孫先生鼎  
為教授病松士務括帖多戾經旨惟公一本傳註每授  
題面試操筆立就先生大喜得士乙卯舉應天鄉試正

統己未會試第四廷試第五觀政吏部庚申

英宗皇帝御文華殿召試薔薇露詩稱 旨即日授行

在翰林院檢討命教內書館辛酉上少師楊文貞公書  
論學文貞長揖謝曰某不知人某不知人古稱韓歐亦  
頗涉功名而此書純是學問中來無一點功名氣大見  
咨異欲薦起之會丁家艱不果丙寅復任辭內書館進  
東閣修書丁卯聞母趙夫人有疾每夕稽顙北辰願母  
子復見是秋奉命主考應天府鄉試得士周興等百人  
事竣星馳見母比還 朝而計至己巳奉柩附葬于佘  
山與先公合兆山多猛虎盜賊公結廬墓側與諸生講

授虎遁跡盜亦遠去時華亭徵收夏秋二稅非時厲民  
適巡撫尚書周文襄公訪公墓廬公陳便民條約文襄  
悉舉行之景泰庚午耆老百人以公廬墓化強暴格虎  
獸事狀白縣乞旌表以勵鄉俗縣下閭里覈實公收牒  
曰親喪固自盡爾奚以旌為辛未復任少保高公穀薦  
充經筵講官上禦寇安邦疏命修君鑑與學士蕭公鎡  
書論不當取宋高宗為法是歲給勅命追贈考妣壬  
申陞春坊贊善仍兼檢討進議奪情疏君鑑成賜綵段  
銀兩甲戌考會試取士得彭華等三百五十人修寰宇  
通志乙亥修續通鑑綱目時蘇松常鎮民代軍運六七



年間餒死者無筭巡撫都御史鄒公來學言于朝與漕  
運官議不合公達諸當道卒復軍運丙子通志成陞左  
春坊諭德兼翰林編修賜白金二十兩綵段二表裏

英廟復位改元天順改尚寶司少卿兼官如故考會試  
取夏積等三百人時奪門報功領重賞者甚衆公謂兵  
部尚書陳公汝言曰今日封公封侯封伯皆足矣獨一  
人未封汝言矍然問為誰公曰當時非奉

皇太后手詔則曹石二公焉敢提兵入禁盡以迎復之  
功歸諸

皇太后請上尊號又引宋仁孝二宗皆上母號為據明

日汝言入奏曰臣昨見錢溥有是言

上即命擇日上

聖烈慈壽皇太后尊號且曰錢溥今何官汝言曰舊官春坊今遷尚寶非其職遂召為翰林侍讀學士賜酒饌加賜白金十兩大紅金織二品服詔修大明一統志充總裁官戊寅

憲宗皇帝時為皇太子出閣命與諸學士輪直侍講己卯考應天鄉試取張文等百三十五人庚辰命教狀元王一夔以下十八人于翰林給誥命贈封如制壬午正月奉 璽書使安南國封黎灝為王賜金織麒麟服

與禮部書論移文內不當云會同原差內官嚴封行禮  
二月陞辭退辭 東宮賜燭羊一體法醢十尊七月至  
廣州與同使太監柴公昇書辯詔勅先後八月至南寧  
府遣官齎書馳報本國迎接詔勅九月入其國黎灝遣  
大頭目來迎且請儀注因論郊迎禮不合公移書反覆  
辯論至呂塊站黎灝來迎公不與坐亦不納其酒漿第  
云今日卿明日王天命不可以僭差黎灝降下一揖直  
受之不送赧赧然退卒如原定儀注行禮受封後黎王  
賙以金銀諸物公作書答詩十首堅辭不受灝行王  
袖出生金一帖謝曰昨中蒙勸親詩書樂善道以

福生民庶不負 朝廷等語所謂一語重千金也故以此報公曰納善足矣何以金為遂登舟王遣頭目伴送至關口復出金公又作書辭還十一月至梧州癸未四月還朝進安南國往來書札六月安南國遣陪臣謝恩就齎原辭贐金請 旨來送八月考會試取吳鉞以下二百五十人甲申出知廣東順德縣獄多淹禁悉與辯理逾月皆空邑故多虎至是絕跡大旱禱之即應間或雨粟鳥雀皆啄食之耆老欲為奏瑞公曰待罪災荒何敢言瑞乃寢乙酉以縣先遭喪亂悉心招撫流民多復業舉行養老恩例孤寡者申給官廩年幼俊秀者收

教于學舊有土城將圯募民限丁田出銀伐石甃之縣  
遂無虞暇則坐學宮與諸生講學論道以里正贄見銀  
幣達奎文閣是春一舉登進士者四人新會縣舉人陳  
憲章以道學自名聚徒教授有誣其藏兵器于山者時  
廣西流賊竊發土民多內應憲司恐貽患地方命掩捕  
之公察其誣力為辯釋且勸其赴會試散生徒以解群  
疑後當道薦可大用授翰林檢討卒全令譽丙戌夏詔  
復侍讀學士閒住縣父老師生塑像立祠祀之詳載布  
政使張公瑄所撰生祠碑并進士梁經所編遺愛集九  
月抵家不入城者七年戊子立母族趙氏先塋碑并祠

堂于細林山購山十畝并割租四石充時薦費癸巳詔  
起公掌南京翰林院辭不允乙未冬十一月冊立  
今上皇帝為皇太子詔至南京忽見孝陵山頂擁起綠  
雲至開讀後方散公撰禎應頌錄進丙申冬考滿赴京  
辭老不允賜酒飯陞南京吏部左侍郎再辭不允己亥  
冬進

萬壽聖節表至京復懇辭陞本部尚書致仕給三代  
誥命以次男垣補國子生陞辭賜勅賜酒飯賜鈔三千  
貫命馳驛還鄉十二月至曲阜謁

宣聖廟具羊豕行釋菜禮過鄒謁亞聖廟庚子正月抵

家辛丑立南梁祖塋誥碑翁仲石壬寅三吳荒公進救  
災恤民䟽蒙勅巡撫行賑糶法時禁民出海捕魚公  
以書達巡撫得弛其禁一時賑糶兼行又開海利人始  
有生意不覺歲之歉也癸卯立忠報堂取勅書中古  
之大臣去國惓惓不忘忠報之言丙午又摘致仕時所  
奉旨內恩命歸榮四字奏立牌坊以崇奉之丁未朝

廷上

聖慈仁壽皇太后尊號詔進階榮祿大夫遣次男岌赴  
京謝恩又命有司月給米二石歲撥人夫四名岌亦補  
國子生弘治戊申

今上皇帝嗣位詔修

憲宗皇帝實錄公重錄所誤禎應頌命及齋奏勅南  
京禮部修纂送史館收載嗚呼此公平生事功之載諸  
年譜者其大略如此其易簣時事則有遺事錄其平生  
著述則有遺菴登庸集使交錄及謫南歸閑南都同年  
倡和歸榮諸集公生於永樂戊子三月十五日其歿以  
弘治戊申五月八日春秋八十有一高祖某曾祖某祖  
某考某皆累贈資善大夫南京吏部尚書祖妣某氏妣  
趙氏皆累贈夫人配莊氏封夫人子七人岡納粟授承  
事郎岐嶧學成而不祿二婦守節旌門垣國子生山金



山衛指揮爰即恩生女二人適中年訓導張璵金山衛  
指揮翁熊孫三人啓宏鄉貢士某某孫女四人適陳槩  
陳福沈高江隆高亦太學生公之終也遺命謂平生知  
契無如予者宜請為行述罔至是以書來屬筆於予與  
鄉郡晚生自入翰林官兩京皆忝從公後辱公教愛為  
多故不辭為序其梗槩以備太史氏之採擇云

### 祭文

#### 祭胡忠安公文

維天順七年歲次癸未十月某甲子朔某日甲子具官  
與謹以清酌庶羞之奠致祭于禮部尚書致仕贈太保

謚忠安胡公之靈曰於戲公之生世八十有九年歷事累朝際遇

列聖獻替匡將惟忠與敬而況持心有恒與物無競雖經變故不違於正夫是以能恩榮始終而人卒莫與之並也昔在

文皇右賢圖治公於此時首被知遇或銜命遠方或承恩禁籞出入中外者閱幾周星未嘗不任以股肱而託之心膂

仁廟踐祚公官辟雍發書金滕知公之忠時方議公重任而歛鼎湖之有遺弓輔我

宣宗莫我民極位六卿典三禮而

上與公咸有一德膺錫賚之駢蕃流聲光之赫奕天下  
之人頌徽猷而景風采者蓋無分於識與不識也維  
皇極統協于神人公實承之迪知忱恤振彼頽綱復正  
大寶公式親焉而身已老錫書置傳歸公閭里曾未幾  
何而公已矣計音來聞

天子震悼贈官賜謚經營宅兆斯固

上之所以篤念元臣而人亦以為公感德之報與也鄉  
郡晚生士林末學其出也方圖視公以為規而公遽返  
乎丘壑然猶有可望者謂將歸以從公杖屨而公復九

原不可作矣嘆哲人之既萎如晨星之落落胡寧不悵  
望歎歎以相顧而錯愕也嗟公仲子予告南奔愧追附  
之莫及聊寓奠夫一樽冀公靈之不昧少垂鑒於斯文  
尚饗

祭吳都憲輿壁文

維年月日年未具官某謹以清酌時羞之奠致祭于亡  
友都察院右副都御史輿壁吳公之靈曰嗚呼吳公敏  
慧絕倫幼知嗜學長而能勤家貧無資亦無師授攻苦  
較淡以講以究弱冠有成試捷鄉闈兩至禮部敗北而  
歸公業益精朝惕夕勵公志益堅不官不娶卒登甲榜

列職蘭臺立朝諤諤糾繩奸回尋奉綸音擢師甘肅載  
持憲節按部西蜀暨丞大理遂陟中丞授鉞邊陲四征  
不庭淮揚阻饑承命往撫令譽既彰謗亦隨起

天子明聖轉公來南繼遭家艱茹荼如甘起公于家殿  
彼嶺海鯨波不驚旬月而代中途被命旋旆湖藩周行  
拊循寧辭險艱敷求民隱督察吏弊威行惠施庶政畢  
舉

帝心簡在進貳大夫移鎮兩廣總我師徒寵任益隆志  
益剴切委身盡瘁是臣之節計聞

當宁感惻宸衷賻奠有加哀榮始終凡在交游孰不歎

悼矧子與公雅篤情好既同發解擢第亦同德義胥勸  
過失交攻南北二臺兩京翰苑宦轍略同為日非淺公  
在湖湘誨言諄諄廣雖在遠嗣音亦聞吾兒忝科公為  
我喜未復自詫云亦有子俟其成立同賦歸休兄昔上  
章志亦未酬聞公斯言且感且愧我實衰朽公胡可去  
國有柱石民有藩垣神理胡僭遽奪其年公子昨來謁  
予太學龍駒鳳雛斬然頭角徐扣其中有識有文公目  
可瞑往志必伸銘墓有文垂世行後顧予何入可託不  
朽執筆欲下老淚先零述德稱功念公平生即幽有期  
往弔無計素車白馬愧此高誼一觴之薦千古永訣聞

手不聞詞音悽咽嗚呼尚饗

祭魏通判文

維年月日具官某以清酌之奠致祭于常州府通判魏公之靈曰猗昔豪傑多產關中求之于今有美魏公明經擢科解褐從仕江左名邦公來作倅財賦征輸維公所司又推其餘庶政是裨公於臨事小心慎密居之無倦九年一日公於治民豈弟仁慈頌聲洋洋萬口一辭比公扶疾入覲

天子謂當遄歸勿藥有喜鞠躬盡瘁蹇蹇王臣豈公之心忍棄吾民民之懷思曷有窮已祠而祝之奚啻百禩

聊陳一奠期公鑒歆斯文之契寫我素心尚饗

祭封禮部侍郎俞公文

振恭同年之父

維公之生質厚才良幼劬於學長知嚮方篤行不違祇服父事抱道不售訓成厥子親安於養壽考令終子率其教乘時奮庸策名危科進學中祕列職儀曹陟官禮寺維少宗伯實貳春卿邦禮是典惟寅惟清敷歷

三朝厥績茂著揆厥本源是父是子封誥推恩至再至三亦有豐祿以具旨甘公於斯時康寧悅豫盛福榮名其來未已公胡不待奄忽淪亡天不慙遺人懷盡傷俱於令子同年契好俄聞訃音益深痛悼越山千里寓



奠一章公靈如在歆此薦觴尚饗

祭叔父存義府君文

維年月日姪學士猷謹遣子沂以牲醴之奠祭告于叔父存義府君之靈曰嗚呼叔父賦性真淳秉心易直慎履諸躬茂脩厥德自壯至老不遺餘力此其所以為三族之瞻依一鄉之表率也昔我祖考貳守延平勞心撫字卒殞其生時惟叔父間關扶襯越險阻而啼孤榮此其為孝有足稱者也暨我先君列官郎署羌未老而先休遂相携於杖屨雖友于之性本之天然而叔父事之敬無違而情不替此其為弟之尤著著也人有謀焉必

露其衷排難解紛不有其功雖受患者間亦見背於旋踵而叔父遇之曾無芥蒂於心胷此又其與人忠也人有求焉施予不吝謹一諾於千金雖片言而必慎視彼匹夫之為諒者曾不足以滿其一哂此又其交友信也嗚呼孝弟者治家之權輿忠信者繫俗之綱維是故族人化之而有孚鄉人信之而不欺皆惟我叔父之是訓是儀也而今已矣貧不自給而弱不自持少無所長而老無所歸措事者無所自而稟令析理者無所自而稽疑此族姻閭里之所以齎咨涕洟者謂天之不憖遺嗚呼哀哉家門多累痛惟我先君棄諸孤而永逝幸叔父

之壽老旋考祥於視履俱昨還家敬瞻眉宇雖暮景侵  
尋而猶力疾以自憇孰謂別未幾何而竟無意於斯世  
也嗚呼哀哉陟崇岡兮悲故鄉故鄉在望兮煙水茫茫  
留宿之原兮祖壠之旁水深土厚兮日吉時良寔是  
即兮地久天長骨肉歸土兮心盡傷音容杳渺兮涕淋  
浪蕙蒸蘭藉兮維俱之將靈爽不昧兮歆此薦觴嗚呼  
哀哉尚饗

祭白尚寶宗璞文

維年月日某官某以清酌時羞之奠致祭于南京尚寶  
司卿白君之靈曰維君弱齡賦命寶竒獨學無友玄教

是師君既年長幡然有覺勇謝其徒此非吾學乃之京  
國從儒師游攻苦澁淡其學乃優乃返鄉閭鼓篋郡校  
封殖亦滋家亦再造秋闈論秀春榜蜚英閱歲戊己並  
捷連登獻策宸廷賜進士第觀政都臺主地官事績  
用有成爰陟副郎正郎再遷楚楚班行粉署含香皇華  
奉使世載之間勞勤罔替東踰遼海南戾湖湘吳越通  
商山陝濟荒輶車所至衆務必舉頌聲洋洋升聞  
當宁符臺之選進位列卿五日京兆入覲于廷君由戶部郎中  
陞尚寶即繞數日通前任考滿疲不知休卒嬰疾疢千里征途旋歸旅  
櫬君才素瞻亦有猷為天胡難謀而嗇其施意君有子

亦天所畀子才而賢可繼厥志人孰無死厥後固聞有  
子如君雖亡猶存矧惟君家世有令德科第蟬聯衣冠  
赫奕其最顯者少司馬公宦達兩京與君相從悼君之  
終哀摧於邑間以語予君葬有日臨窆無由有情曷伸  
白馬素車永懷古人寒泉泠泠露菊采采歆此一觴君  
靈如在尚饗

祭薛志淵御史文

嗚呼志淵以篤實之學宏偉之器發身賢科擢官柱史  
而且負搏擊之才懷獻替之志持無撓之節勵敢言之  
氣故凡珥筆登朝埋輪遣使不混混以碌碌恒侃侃而

暨暨揚文采于臺端播風聲于寓內宜其為搢紳之所屬望

當宁之所倚注也乃者湖南列郡流民嘯聚廷議謂君才堪撫治爰授勅以遣行遂持斧而直指君乃夙夜在公不遑寧處循行山谷衝冒寒暑占復流移安輯境土咸欣欣然幾於得所而君竟以勞而致疾以漸至於大故矣嗚呼躋九列登三事建勲庸綿福祉皆君之所必至夫何位厄元侯年虧中壽平生抱負百不一試顧乃溘然而長逝也至於滫瀡之供養未終於嚴父詩禮之傳教未成於賢子何辜於天降此大戾嗚呼志淵生死

在人晝夜常理天何容心脩短有數抑雖短於一時而  
能長於百世嗚呼志淵差可自慰某也鄉郡末親忘年  
至契嗟聞計以徬徨愧懷祿而未去聊寓詞於一奠言  
有盡而情無已也嗚呼尚饗

祭楊叔璣郎中文

維年月日具官某以清酌庶羞之奠致祭于故奉議大  
夫禮部郎中楊君之靈曰惟君以一時瑰瑋之才累代  
簪纓之裔蚤蓄學以成德茂擢科而登第銓衡掄選既  
列屬於地官錢穀委輸遂典司乎國計迨轉儀曹益嚴  
祀事試長才不頓於鉏耒礪清節無損於瑕纈蓋士方

期君大用而君已急流勇退將稅駕于故園乃抗疏于  
明廷三徑就荒尋柴桑之舊隱五湖密邇結鷗鳥之新  
盟黜陟不聞寵辱不驚有尊酒以陶情無案牘之勞形  
委貲富於山積介福祉如川增蓋人方慶君下壽而君  
已騎箕上征夫五品大夫不為小矣六袞耆年不為夭  
矣徒以君台輔可登而位不躋於通顯期頤可到而齒  
不儕於耆老譬如大椿之筭方延而遽隕於中歲良驥  
之足方展而竟局於近道故凡聞君之終不問識與不  
識無不深嗟而永悼之也矧如予者素忝親知曩昔聞  
訃無任嗟咨及茲又聞窀穸有期愧執紼之無緣聊敷



祗以陳詞寓一奠於几筵惟君靈其鑒之尚饗

祭江太宜人邢氏文

同年東之學士母

嗚呼宜人質粹而純性專而慧為女婦師作君子配教  
子以嚴而濟慈治家以勤而興廢被臧獲以憫仁接宗  
嫡以和惠持素行于閨中流芳聲于閭外於是天鑒厥  
衷慶臻其會家裕而亨子賢而貴步玉登金紵朱衣綵  
惟時宜人熙然壽愷寵渥是承而意無驕盈大耋是  
躋而形無衰邁祿養在庖享之不以為豐命服在躬被  
之不以為泰全五福以令終不百年而奚悔

當守計聞遣官諭祭朝紳祖奠靈輿太史鐫銘幽窆既

生榮以死哀雖身亡而名在誠罕儼于今而宜與古對  
者也某辱交令子斯文契誼嘗效祝於宜人期福祿之  
無艾儵風木兮興悲嗟欲養兮不待釃酒臨江薄陳一  
酌尚鑒歆之靈兮不昧尚饗

祭陳直夫御史母文

惟靈賦性柔嘉毓德貞靜嬪于儒門治其內政相夫教  
子以順以慈以備為成古人是師北郭之高樂羊之義  
太中之行榮陽之志由嬪有人以成厥美求之夫子於  
斯何愧軻也大儒侃亦名臣不疑無苛玄暉能貧其教  
之成實維其親求之令子寧匪其倫詩不云乎令妻壽

母既蘊淑德宜臻遐耆矧茲臺端祿養優游有岳之榮  
無畬之憂胡為屬疾奄至大故可喻者理難窮者數惟  
予與子道義論文休戚相關我心實勞聞計之夕以疾  
在告曾幾何時靈輒在道寸忱未究有淚盈襟薄陳一  
奠靈其鑒歆尚饗

祭平江恭襄侯文

弘治三年五月六日過淮偕白  
亞卿廷儀王都督銓同奠祠下

維公稟材英傑際世休明茅土疏封河山帶礪

列聖御宇寵任益專千里漕渠饋餉不絕功利在國惠  
愛在人求之當時鮮與倫媲江淮草木皆知公名公亡  
猶存實有賢胤世濟厥美勲業愈隆乃葺公祠在淮之

渼春秋裸獻則有司存其等久慕公名且交公胤舟經  
祠下瞻拜有嚴薄奠一觴公其鑒格

加封改題神主祭告文

維弘治四年歲次辛亥六月丙午朔十二日丁巳孝孫  
僊敢昭告于

顯祖考延平府同知贈通議大夫南京吏部右侍郎府  
君

顯祖妣封太宜人贈潞人蔣氏

顯考兵部主事贈左庶子兼侍講加贈通議大夫南京  
吏部右侍郎府君

顯妣封太宜人贈淑人朱氏曰與自筮仕于今四十餘年歷官兩京致位二品實維

顯祖考妣慶澤之貽

顯考妣訓迪所致乃於今年四月二十七日祇奉玉音加贈

顯祖考 顯考俱資政大夫南京吏部尚書

顯祖妣 顯妣俱夫人暨先室贈淑人吳氏亦加贈夫人已用新授官階封號更題舊主謹以牲醴用伸虔告

仰冀 尊靈服斯

寵命以歆時祀以庇佑後人延於永世以先室淑人吳

氏祔食尚饗

家廟成祭告文

維弘治四年歲在辛亥七月乙亥朔二十一日乙未孝  
玄孫僉敢昭告于

四世考妣之靈曰僉營構新第亦既苟完爰即正寢之  
東創建家廟五楹中敞三楹正列四龕恭奉

高曾祖考四世神主旁列二龕恭奉 祔位神主序次

以左為上旁親不以班祔蓋禮緣義起事亡如存之義

也仰冀 尊靈俯垂降鑒永奠厥居庇佑子孫世守勿

替謹以牲醴用伸虔告以某親某封祔食尚饗

家堂神祭告文

維年月日資政大夫南京吏部尚書王與敢昭告于  
勅封威濟李侯王之神曰維神之封莫詳所始顧我先  
世奉祀有年予承厥緒亦惟循舊乃者新居既建家廟  
聿成即左一室奉安神位消此吉辰特伸虔告伏惟降  
格以妥厥靈佑我後人俾克永世謹告

南京吏部新建土地祠成祭告文

維弘治五年歲次壬子五月庚午朔二十六日乙未南  
京吏部尚書王與右侍郎童軒等敢昭告于  
本部土地之神維神降依茲土亦既有年先後因仍室

宇未備廼者相方定位鼎建新祠華構聿成吉日斯卜  
式陳菲薦用妥明靈尚祈顧歆永垂休庇謹告

祭昇孫文

維成化二十二年歲次丙午十二月壬申朔二十六日  
丁酉汝祖父繫官于京不能親視汝寔乃命汝弟昇具  
牲醴庶羞之儀祭汝長孫昇之靈而言曰嗚呼吾孫之  
亡吾不知其天何意也何生之甚奇而奪之太遽也何  
長育成就之難而摧殘夭闕之易也豈吾行負於神明  
而吾孫適當其戾也豈吾宗有碩大蕃昌之胤而為造  
物者之所忌也抑命稟於有生之初而吉凶壽夭皆莫



逃乎數也嗚呼吾孫之亡吾不知其天何意也方戊子之陽月開六莢之堯蓂日東旭而在辰實吾孫之誕生時予方居太夫人之喪而親表接跡于門庭謂充閭之有慶試英物於啼聲予雖辭不受賀而中心亦不能無憂喜之并也歲在乙未汝生八齡汝父登朝遂以家行遣汝從師冀汝夙成自是數載予三入京視汝之質脩穎而可念課汝之業懇篤而有程每留旬日喜溢於情蓋不惟謹送迎之候而尤竭奉養之誠於是期汝於亢身亢宗庶幾吾先世積善之徵也今年丙午汝才卓軼夫既加冠所宜授室遣人取汝見汝朝夕忽汝父以書

來告汝嬰疾予雖日切憂懸然猶自幸謂仁者有後維  
天其可必也詎意汝疾竟不可為雖療以醫而百方罔  
效雖禱於神而一誠莫格汝雖病在牀褥而猶諄諄告  
戒汝弟俾毋荒於嬉而安於逸俾勉於進取而時不可  
失噫汝之器識何如也而神胡不相遂使汝至於此極  
汝母送柩南歸故鄉汝父留京柰縻於職哀哀兩地抱  
此深戚至於汝祖病不問醫殯不視殮葬不臨窆傷我  
心之如割潛涕淚之霑臆時日之良宅兆之吉汝安歸  
之近在汝曾祖考妣之側嗚呼頓遠迹於促路屈長筭  
於短日固人生之無常亦天道之叵測予何言哉予何

言哉嗚呼尚饗

思軒文集卷之二十二

三

思軒文集卷之二十二

思軒文集卷之二十三

方外

勅賜嘉福寺記

彭城之山岡嶺四合隱然如環旋繞州境宋蘇文忠公嘗為文以紀其勝矣去州東北二十里泗水之上有山名桓山因其下有石洞亦名洞山即文忠所嘗彈琴于此者又地之尤勝者也

皇明天順五年中貴劉君質奉命來監軍儲始即其地建佛刹其同事馬君敬韋君通又從而協贊之蓋歷歲數稔而成乃請于朝賜名嘉福禪寺近予舟過彭城

韋君載酒請遊且求為記夫自有宇宙即有此山其昔也染於桓魋之惡自謂千古不磨詎知百世之後有文忠公者登臨嘯詠播為清風以蕩滌之又數百年有三君子者經營締構建為大刹以鎮攝之使後之人知慕風猷而忘其污鱗知有洞天福地而不知為荒丘廢壠使居者喜遊行者思止是豈非茲山之幸歟雖然予竊有感焉當宋熙寧中彭城大水文忠為守發粟飼饑民賴以濟近數年來徐兗之區數被水患而茲歲尤甚皇上軫念黎元既命近臣振廩勸分周行拊循至於一寺之額亦以嘉福為名蓋謂荒政十二有散貨財索鬼

神之目苟賑之不給又藉神力以陰相之以攘除菑沴  
涵蒙祉福使協氣嘉生薰為太和以登之富壽平康之  
域不特拯患一時而已也是又非斯郡斯民之幸歟誠  
如是吾見君所監儲賦日益豐羨所營紘宇日益完美  
資之以足國而庇民者其功日益加盛又將有如文忠  
公者為君大書特書顧予不文姑畀寺僧鐫之石以志  
歲月云爾

送靈谷嘉本初分題詩序

金陵之山其最秀拔者曰鍾山浮屠氏之廬之據有茲  
山之勝者曰靈谷寺寺住僧煥師用章三衢人其為人

持律嚴其言有文其心泊焉無所累又其徒之傑然者  
也予往在南京嘗與遊焉為別且三年矣每思之不置  
今年夏其徒曰性嘉本初者來遊毘陵寓天寧寺首謁  
予道其師所以不忘於予者寺有樓曰塵外樓在茂林  
脩竹間本初居之雖盛暑中有蕭颯意間出小井寺間  
劒井禎應觀太平寺水壁即楊萬里嘗稱其絕妙一時  
者登君山憇浮遠堂堂在光孝寺瞰江凭闌四顧千里  
一矚歷嵩山訪膠山寺僧延坐一室有峯當戶焦千之  
刻詩其上其半挿雲霧中隱隱可辨識者僅得雲擁秀  
峯來戶外三數語爾過華藏褒忠寺上雲海亭亭前臨

太湖一檻之外波濤洶洶望七十二峯近可攬取如盤  
盂中物因誦僧法尚詩其卒章云明日慧山曾有約又  
携茶鼎汲清泠遂去尋陸子品第二泉飲之自是艤舟  
餐畫溪披荊棘行二十里至善卷洞與寺僧戒航秉燧  
深入窮天然精巧處出就航語留止信宿端歸過予言  
曰性嘉既飽玩名郡山水且得諸搢紳詩甚富詩皆指  
閱歷處為題視之囊中獨少公一言幸不鄙而賜之言  
持歸以見吾師信不虛此行矣世嘗稱吾儒者之與浮  
屠氏遊常不于其迹而于其人必其人有道其所愛慕  
而服習者多與吾儒者事同吾是以略其異而取其同



而與之遊如唐文暢宋聞復之流求之于今則本初其人也本初工書作詩間亦有奇語如聞復喜文辭有行必請諸搢紳以詠歌其志如文暢是宜其得此於人之多也蘇長公不云輪扁斲輪病癭承蜩苟可以發其智巧物無陋者矧文辭之正詩書之雅乎本初幸以予斯言歸告而師母徒曰華嚴法界盡屬遽廬而已也

贈陳一源序

毘陵羽士陳一源自少棄家從其師荆公學老子法居邑隋司徒廟者三十年始荆公為道紀時陳君已入室此公銳去陳君乃盡得其傳以闡其教以重為其徒所

慕如君之慕其師乃者道紀缺員僉宜於君言於郡上  
於吏部遂授職為副都紀將行道錄右街玄義月淵丁  
公請言贈之予惟老氏之學以清淨無為為本故學之  
者必定而不躁嗇而不豐以遺世絕物超然遠引於埃  
壚之外可也而世反為之羈繫官其屬立綱紀以司之  
夫豈無所為哉為其道計也必求其人學術之精志行  
之確者以統攝一方使玄教有所歸真官有所託而不  
至於頽靡廢墜者此朝廷初制之意蓋非徒欲顯其  
名以混其真使與凡俗伍也陳君之長曰張君碧虛其  
所居玄妙觀久燬於兵觀舊有飛霞樓張君欲建復之

未果近又聞君所居亦弗戒於火蕩然為瓦礫之區矣  
陳司徒有功於常常人至今祝之列之祀典此誠不可  
廢者君歸與張君圖之秉公以持已積誠以感人度其  
時之所宜力之所至循先後緩急之序以復其舊而更  
其新夫然後禁戢其徒使毋為沈湎淫佚以干於正以  
忝厥宗則君之能事畢矣豈真欲隘寰區謝塵鞅憑虛  
御風以汗漫於八極而始為妙道者哉予忝與君同里  
聞知君為深故不辭丁公之請而序以贈君如此

送玘玉峯東遊序

浮屠玘玉峯將東遊吳越致其師乘菴載公之命來請

予一言先之予未知所以言也因詰之曰子之遊為求道耶獨不觀雲在天水在瓶曷為無礙曷為常清淨子就子之師學焉以究竟之道在是矣為求諸履歷耶亦嘗聞之石頭路滑百丈竿危曷所從來曷由進步子叩子之師而悟入焉平生履歷可自是而超越矣顧安事於遊哉玉峯悄然曰凡先生之詔我者皆玘嘗聞諸師而能了者也玘之心徒有跂慕於儒者之道山水之勝所不能博求而遠覽者拘於法而泥於跡爾玘聞之由金陵而東稱勝地者為吳越吳越之區有名山有聞人玘是以願遊庶幾其有遇焉先生幸無惜終教我也予

復之曰此正予所不能言也天下之拙於遊者莫予若也幼而學跼蹐一隅壯而仕周旋兩京今老矣方圖退處以偃息林下所謂少年自負以盡大觀而昌於辭者秀竊有愧顧何以教玉峯哉雖然予居與玉峯隣亦嘗造乘菴丈室見玉峯以琴侍矣琴君子之所御也琴禁也禁止於邪以正人心也予將假是以為言又素不能琴姑舉所嘗聞於蘇子者為玉峯言之昔蘇子過僧紀老見其侍者援琴作數曲拂歷鏗然以一偈問之曰若言琴上有琴聲放在匣中何不鳴若言聲在指頭上何不於君指上聽侍者大悟玉峯東遊試求之蘇公所嘗

宦遊之地如杭湖諸州其流風遺韻必有存者庶幾有  
能為玉峯作倡因之以覺悟焉玉峯矍然起謝曰命之  
矣

道錄司右玄義月淵丁公傳

月淵姓丁氏名與明字炯然常州武進人父裕有隱操  
所居濱西瀾湖號漁隱生月淵三歲而卒臨終指謂其  
母薛氏曰是兒氣格不類塵土中人宜善字之稍長遊  
學鄉先生柚山蔣公之門一日歸告其母曰先生道誠  
可師顧所與同遊者多務躁競兒心厭之此地去三茅  
山不遠素聞其中有至人欲往從之遊母不能止遂從

黃冠師朱復觀入山見前道錄右正一復古湯公曰此  
吾師也事之良謹宣德間始著籍為道士時通妙真人  
邵公掌玄教為一時羽流所尊仰月淵以師命往見之  
真人奇其志趣淵靜留一歲悉授以清微諸階雷輿道  
法金火返還之旨與夫棲神煉氣之術且曰道統得人  
吾無憂矣正統丙寅宗伯胡公薦授華陽洞靈官兼崇  
禧萬壽宮住持宮故梁陶隱居寓所其三清殿燬自元  
至正丙子迄今未有能葺治者月淵首建復之冢宰泰  
和王公為之記復即隱居曲林下館構一軒前頡清溪  
口居之以涵泳妙理宗伯題其楣曰月淵清趣因以為

號景泰癸酉夏六月不雨句容縣令浦洪屢禱皆不應  
乃持辦香詣月淵乞禱之月淵為立霄壇禱三日雨如  
霆四境霑足乙亥夏復旱復禱有應然歲訖不登餓殍  
載道月淵設糜置山蹊間飼饑所全活者甚衆尋被召  
入朝為道錄右街玄義兼朝天宮住持自是遇

萬壽聖節春秋祈報凡啓建金籙大齋必明禋肅恭為  
朝廷逆釐累荷白金綵幣之賜月淵為人端謹有戒行  
不飲酒食肉讀書喜觀前代史尤喜吟詩故吾儒亦樂  
與遊學士大夫每遇休暇輒相携過月淵所引壺觴以  
為樂或分題賦詩月淵倚歌而和之亦屢有奇語酒酣



躡屐登蓬萊萬歲山命一二仙童起舞翩翩出竹樹間  
真若緱山仙侶馭青鸞而來下者衆客多樂而忘返而  
月淵貌益恭益繾綣不少懈日暮客散篝燈閉一室挾  
書冊坐夜漏下十刻方寢其自處簡重而接人謙虛類  
如此其性尤不豔聲利其平生所得

上賜不私諸帑中復古師懶雲王真人所著有懶雲私  
稿若干卷月淵命工鋟梓以傳官一階且廿年年幾六  
袞矣而不與躁進者較得失曰吾行且還山矣吁亦賢  
矣哉予與月淵有鄉郡之雅恐其去此而貫鴻濛息沉  
默汗漫遊于九垓之上吾無以窮其蹤故因其徒清白

之來南京預為作小傳以授之使傳焉

論曰老氏之學本之清淨無為遣去情累介焉以自守  
於凡至自外者舉不足以汨而淆之也吁亦難其入矣  
予在史館時見復古湯公通妙邵公或契道贖或秉玄  
教為時所推

上所寵異然其葆真養和翛然有物外之想固同乎靜  
而不躁簡而不肆也二公者既相繼化去而復見吾月  
淵此其師友淵源之所自固未嘗泛焉無統而眈彼擾  
擾之徒以情偽之私混于俗謬悠之辭譁于世者其相  
去奚啻天淵哉世謂由儒學者絀老氏亦豈盡然哉亦

豈盡然哉

印菴禪師像贊

印菴禪師用彰煥公宅心淳古操行峻潔今年  
世壽七十其徒為繪小像于忝知雅情為題贊

秀目厖眉此壽者相廣頽豐頤此成佛像闡大慈雲其  
瑞氣紛郁現無垢月其祥光輝朗據講壇雨諸天之寶  
花主靈山飛層空之錫杖契妙理於三乘斷塵根於百  
想所以小住人間七十年遍遊物外三千界而為萬億  
衆生之飯嚮也耶

常州府僧綱司都綱漚居因公塔銘

漚居因公以正統戊辰五月廿八日示寂于天寧東院

其年九月十三日葬院之後園建塔為識教諭臨川聶  
大年已文諸石矣其嗣孫慧澄謂塔邇居室溷褻匪宜  
乃改卜安上鄉之湯墅村孝思菴故址以天順庚辰某  
月日啓公遺軀葬焉尋又結菴數楹買田三十餘畝為  
香燈永業乃請予友朱悉易為狀持來南京以屬予銘  
公諱淨因字覺初漚居其號也蘇之吳江徐氏子母薛  
甯夢僧入室而娠公生有異相幼與羣兒嬉有捕鳥雀  
者輒取而縱之曰毋傷物命入僧寺見諸佛像必作禮  
膜拜父母奇之曰是兒殆有夙緣即遣從舅氏無盡慧  
公學出世法于大乘院時年甫十三未幾又去從述菴

傳公于承天寺間往虎丘見中行復公復曰汝來何為  
曰為生死爾曰生亦不死死亦不死公猶未喻其旨一  
日偶謁蘧菴佑公質之蘧菴曰子讀楞嚴經當自解公  
取而讀之至歸元性無二方便有多門即超然覺悟於  
是屏居遮山篤意究竟久之聞僧錄同菴簡公主教天  
界寺大明宗旨請侍巾錫凡三閱寒暑深有證入已而  
辭歸受具說法于定慧寺永樂甲午 朝廷簡名僧修  
大藏經典公兩預焉事竣賜賚有加同時有願留京師  
希近侍者公獨翩然東還定慧刺指血書金剛彌陀經  
粉金銀為泥書華嚴法華四十二章佛遺教彌陀楞嚴

圓覺金剛經總若干卷積十有二年而成蓋杜門却掃  
攻苦較淡不恤勞瘁不恤資費噫其志可謂堅矣宣德  
庚戌常守莫公愚顧天寧首刹宜得名緇為衆領袖有  
以公薦者遂馳香幣聘主其席會僧綱司都綱缺員郡  
又上其名禮部尋擢任焉時莫公奉勅守郡以嚴辦  
為理沉毅寡言人莫有當其意者然獨與公雅厚公任  
都綱之明年遂協謀創建四天王殿重構兩廡丈室僧  
堂庖廩與夫像器花幡靡不具完溢於舊觀雖出莫公  
之所經畫然亦由公贊理之有方也正統丁巳以老謝  
師席度寺左偏築室一區環植松杉居以自逸即東院

是也丙寅併致僧綱司事日惟焚香趺坐澄心淨慮閱  
大藏經且半忽晨起沐浴更衣奄然而化世壽七十有  
九僧臘六十有七公器宇深邃端重簡默觀時識變隨  
機應務故任職幾二十載嚴而有守宗門多信向之手  
度弟子一人曰宗尚先逝徒孫三人曰道源住大乘院  
曰得純任無錫縣僧會其次即慧澄繼住天寧世守其  
業諸孫三十七人澄字一清今年亦七十六矣才識行  
誼無忝厥祖名卿碩儒多所遊從予家食時尤與厚善  
斯銘之屬澄固不能舍予而予亦無庸讓也銘曰  
像法之教歸於正覺密付心傳孰開來學偉乎溫居岷

起吳中五及師門一言感通翻譯之榮

皇恩有眷繕寫之勤血鏡金凝既蒞法會遂領緇徒紺  
宇聿新溢於通都曰人有生奄忽泡幻矧茲空寂詎宜  
耽戀勇謝世緣反關息機壽七十九乃入茶毗院東有  
圃舊營窳堵有賢嗣孫更治淨土湯墅之原新塔巋然  
續續香燈有廬有田三千大千洹沙世界萬劫雖空英  
風如在



思軒文集卷之二十三終

附錄

王文肅公傳

公姓王氏諱俱字廷貴常之武進人也祖友諒福建延平府同知有惠政父守正兵部武選主事以廉慎聞皆累贈南京吏部尚書公十歲能為詩正統甲子以縣學生舉南京鄉貢景泰辛未舉禮部會試 賜進士及第第三人授翰林編修被 旨偕諸庶吉士讀中秘書給酒饌筆札諸物癸酉旱代祀東嶽雨輒降甲戌以父憂去天順丁丑仍舊職庚辰同考禮部充 太子講讀官辛巳預修大明一統志成有白金綵幣之 賜癸未再

考禮部得人尤多秩滿遷侍講甲申

憲宗登極錄侍從勞擢左春坊左庶子仍兼侍講時始開經筵勅公充講官復賜金幣又勅修

英宗實錄分掌禮館纂述詳慎得史臣體公念母老求便養成化乙酉李文達公薦公名改南京翰林學士乃迎養于官丁亥實錄成復以舊勞賜金幣戊子以

母喪去辛卯服闋適南京國子監缺祭酒朝廷用吏

部薦即公家起之時教法久弛公嚴立程制核勤惰為

懲勸諸司差遣一按名籍不為私假又條奏便宜數事

壬寅秩再滿擢南京吏部右侍郎吏弊滋甚凡差撥則

庭闕不可制公酌為定規弊始息丁未 召為戶部左侍郎

今上嗣位遷南京戶部尚書尋改吏部考諸司官屬評訪去取務合輿論又奏其有小過而才可用者若干人得降秩補外俾圖自勵又上疏陳八事多見采納自餘廬舍工役之細悉為綜理咸得其宜弘治癸丑年七十疏請致仕

上優詔勉留再上亦如之甲寅公以兩考去還鄉卧病疏復上辭益懇

上重違其意許之又念公舊臣進階榮祿大夫命有司

歲給廩粟興繇以示優異報至公已疾篤越二日卒乙卯五月二十二日也年七十有二計 聞 贈太子太保謚文肅遣官諭祭賜葬于定安西鄉之原公娶吳氏江西左布政使潤之女早卒累贈夫人繼娶孫氏尚寶丞仲微之孫封夫人皆有內行子二長沂成化乙未進士累官湖廣右布政使以才行世其家次洛翰粟賑饑授鎮江衛指揮使女五長早卒次適承事郎鄒堂次適鄉貢士朱杲次適府學生段瑞次適中書舍人徐元概今少傅公子也孫五女孫四曾孫女二公奉親極孝養事伯兄廷彥甚謹以三品 恩移廕兄子澄為國子生

歲出所積穀贍族人者若干斛遇鄉黨子弟有恩嘗購得楊氏別業有世墓慰令勿徙缺其垣俾歲時往祀焉公博學高識為文章雅健有法著思軒稿若干卷兼精吏事敏而能勤久在散地老雖居重位又不值繁劇人以為未盡其用云

贊曰觀室者必觀其隅顧不信哉公風采凝峻廉角峭厲素善奕且所酷嗜及為祭酒輒絕不復事其克制操執不為俗變類如此故教法修整羣士皆歛衽欽服凜然稱嚴師焉使公前為翰林獲司密勿侍

天子左右後為吏部獲近輦轂居廟堂進退百官其

所樹立匡扶豈少哉謚法正已攝下曰肅文固公餘事也謚之曰肅不亦稱情矣乎

賜進士出身嘉議大夫禮部右侍郎兼翰林院侍讀學士知制誥經筵官兼修國史長沙李東陽著

思軒集後序

太宰先生嘗示彥以其所粹  
思軒集命序其末簡曩先生  
任南雍大司成時彥卒業門  
下蓋六七載先生道德之高  
文學之粹教法之嚴皆冠絕



今古一時英才賴陶養以成  
就者甚衆間復發為文章形  
諸詩歌義精而密辭確而暢  
得之而寶者真若麗金拱璧  
也觀之而快者真若景星卿  
雲也彥諸生日侍函丈竊

窺一二即手錄藏去以為寵  
然未獲見全集也今先生不  
鄙示彥得拜觀之奚止於在  
南雍時耶蓋前任館閣者有  
焉今居臺省者有焉其間多  
大制作大議論上以鳴

國家之盛下以闡天下文明之  
化溼溼乎貫道之器也洋洋  
乎治世之音也是宜先生粹  
而集之以垂範於將來也然  
集必以思名者蓋道具於心  
心職於思思之不精道不明

也道之不明文不醇也孔孟  
以上之文世固無容議矣唐  
宋以下代有作者然論者率  
謂韓柳歐蘇為詞章之文至  
論道義之文必歸之周程張  
朱非以其所思之純於道歟

先生敷歷仕途幾五十年而  
沈潛於理義之思者非一朝  
夕之故惟其涵養也深故其  
發越也宏其練達也久故其  
貯積也富道宗周程張朱詞  
兼韓柳歐蘇而成一代之制

作即周子所謂篤其實而藝  
者書之也將來經世傳遠如  
李徐二宗伯之評誠為確論  
尚矣容彥贊言哉雖然昔歐  
公命曾鞏為醒心亭記鞏以  
托名其間為幸當時諸生之

及門者今皆散去獨彥獲踵  
後塵來視篆于詞林以聽教  
左右固為幸矣而又獲覩斯  
集之全且托名於不朽豈不  
為尤幸已乎故不敢辭蕪陋  
謹述其所見聞以復於先生

如此願承教焉

弘治七年甲寅六月中浣  
賜進士及第南京翰林院侍  
讀學士奉直大夫前

太子左諭德兼

經筵官同修



國史門生泰和曾彥謹識